

Avant otganta onns

DA GUIU SOBIELA-CAANITZ

■ **«Wir Schweizer werden nicht zuerst ins Ausland wallfahrten gehen»: Quai ha declarà cuss. fed. Hermann Obrecht (1882–1940) ils 16 da mars 1939 cun in'allusiun al viadi a Berlin dal president tschec Emil Hácha (1872–1945) tar ses «protectur» tudestg.** L'emprim da settember, gnanca sis mais pli tard, ha «cumenzà la Segunda Guerra mundiala cun l'attatga da la nav da guerra 'Schleswig-Holstein' cunter in champ militar polonais (...) sper Gdansk/Danzig. A medem temp ha la Wehrmacht violà il cunfin da la Pologna en set lieus differents (...). Ils 2 da settember a Berlin ha l'ambassador britannic (...) surdà l'ultimatum da sia regenza, mess il cas che la Germania na retiria betg immediat sias truppas da la Pologna (...). La regenza ed il commando suprem da la Pologna han spetgà invan il sustegn da las pussanzas dal vest (...). Varsovia ha capitulà ils 27 da settember; quai han fatg las davosas truppas polonais ils 6 d'october.»

Il patg tranter Hitler e Stalin

Tranter la capitulaziun tscheca da mars e la polonaise da settember era schabegià in eveniment decisiv da l'istorgia diplomatica dal tschientaner passà. Reuth: «Ils 23 d'avust han il minister tudestg da l'exteriur Joachim von Ribbentrop [1898–1946] ed il cumissari sovietic da l'exteriur Viatcheslav Mihajlovitsch Molotov [1890–1986] (...) firmà in patg da nunagressiun (...). Tiers ha in protocol supplementar

zuppà (...) marcà las sferas d'influenza da las duas pussanzas en l'Europa centrala e da l'ost: Lettonia, Estonia e Finlanda per l'URSS, sco era parts da la Rumenia (...) e la Pologna da l'ost; lez pajais era destinà a svanir (...). Cun lez patg e cun il conflict da Gdansk/Danzig eri per las chapitalas europeicas cler ch'ins duaja spetgar per bainprest in'attatga tudestga cunter la Pologna» (pp. 79–80 ed 83). Da l'ost è lura vegnida in'attatga sovietica: «Ils 17 da settember ha Stalin cumandà a 450'000 schuldads e strusch 3'800 panzers sut la protecziun da 2'000 aviuns da penetrar en la Pologna da l'ost (...). Moscau ha fatg a savair ch'ins haja vuli gidar la populaziun. Suenter tschintg dis eran las operaziuns da l'Armada cotschna a fin (...). Ils liquidaturs da la Pologna han arranschà ina parada cuminaivla da truppas (...). Ils 28 da settember ha la firma d'in 'contract da cunfin e d'amicizia' spustà la demarcaziun sin il flum Bug; per la paja han ins transferì la pli gronda part da la Lituania a la sfera d'influenza da Moscau. Lur han ins cumenzà a sovietisar. Ins ha integrà ils intschess conquistads a la Republica sovietica ucraina u a la bielorrussa. Ins aveva entschavì vastas 'nettegiadas' gia tar l'invasiun. Cunzunt en Galizia, a Lemberg ed enturn Lemberg (...) ha il servetsch secret liquidà, arrestà u deportà millis commembers da la classa superiura, da l'armada e dal clerus. Ins ha schluppettà passa 4'000 uffiziers sin cumond da Josef Vissarionovitsch Stalin [1878–1953] en l'isolaziun dal gaud da Catin» (pp. 90–92). Areguard l'istorgia da la Pologna en il 18avel

tschientaner distinguan ils istoriografs savens trais partiziuns da lez reginam: L'emprima e la terza tranter Austria, Prussia e Russia, la segunda senza l'Austria. Ins po era resguardar ina quarta, quella dal ducadi da Varsovia il 1815, tranter la Russia (Pologna dal Congress da Vienna), la Prussia (provinza da Poznan/Posen) e l'Austria (Cracovia). Quella tranter Hitler e Stalin è lura la tschintgavla segund il geopolitolog genevrin Aldo Dami (1898–1977)*.

«Liquidaziuns etnicas» e genocid

Moscau ha sovietisà er il Balticum. Reuth: «Ils Finlandais han dentant resistì. Perquai ha l'Armada cotschna mess ad ir ostilitads cunter lur entir cunfin [da Petsamo sper la Mar da Barents a Viipuri sper il Golf da Finlanda] (...). En ils intschess annectads ha il 'Reich' stabilì Tudestgs dal Balticum, da la Moldova, da la Bucovina e d'autras regiuns da l'Europa centrala e da l'ost (...). Per ils gidieus survivents da la Pologna ha lur entschavì in martiri cun trais milliuns unfrendas. Latun 1939 han ils nazis l'emprim reunì ils gidieus en ghettos urbans, cunzunt a Varsovia, Cracovia, Lublin, Radom e Lodz (...). La politica dals nazis areguard ils gidieus è crudada en Pologna (...) sin in terren favuraivel (...). Lez antisemitissem viveva tranter auter er en la baselgia catolica dal pajais. Il 1936 ha ses parsura August cardinal Hlond [1881–1948] reproschà als gidieus en ina brev pastorala d'esser 'l'avantgarda da l'impiedad, da la regenza bolschevica e d'activitads revoluziunarias» (pp. 92–94).